

白樂天文集卷之八

制

李愬贈太尉制

勅故特進行太子少保上柱國涼國公食邑三千戶
食實封伍伯戶李愬在建中歲泚賊叛渙惟太師晟
協謀大順翦而潛之在元和朝蔡寇克斥惟爾愬實
奮奇策虜而戮之父子之功書于甲令俱為第一耀
焯當時矧爾一登將壇六換鉞鉞坐論巖廊之道臥
理保傳之事方深倚望奄忽淪謝是用當食累歎視



朝三轂豈不以爪牙之威缺於外股肱之痛軫於中者乎而弔奠之命賙賻之數雖加常等未表殊恩宜以太尉之秩贈上公之袞歛俾爾被哀榮服忠孝從先太師於九原也不其盛歟嗚呼美終必復禮無不答昔尔之勤勞如彼今吾之寵飭如此君臣報施可謂兩臻其極焉尔靈有知欽我追命可贈太尉仍令司備禮冊命賜絹二十疋布七十端米粟一千石委度支送

田布贈右僕射制

勅朕聞古之臣子有忍死効節為忠者有不傷髮膚全歸為孝者有不顧性命引決為忠者但問所操所蹈何如耳豈計去就生死之間耶噫今有重義如泰山輕生如鴻毛死而不朽者安得不褒揚寵飾使天下聞之所以勸孝心激忠腸然後薄者敦懦者立幸生者恥格也故魏博等州節度觀察處置等使起復寧遠將軍守右金吾大將軍員外置同正員檢校工部尚書兼魏州大都督府長史御史大夫賜紫金魚袋田布其父太尉甚賢此子鎮陽之亂弘正歿焉而

布枕干嘗膽誓報冤耻故吾以大將軍之旗鼓鈇鉞
先臣之土壤士卒盡用委付親加勉論人鬼之憤期
一洩而甘心焉既而激發魏師出疆臨敵事有不得
已者布亦末如之何卒至於剗心自明遺疏自列謝
君於天上報父於地下可謂田氏有孝子國家有烈
臣則吾之知臣弘正之知子明矣聳動人聽盡傷我
懷故廢臨朝所以示哀也加禮命所以示榮也哀榮
恩禮至則至矣嗚呼曾未足以顯尔之節不厭吾之
心可贈尚書右僕射賜布帛三百段米粟二千石委

度支逐便支遣

韋貫之可工部尚書制

勅河南尹韋貫之善馭者齊六轡善理者正六官六
官成則百事舉故吾選賢任舊以次第補之而六卿
材吾已得五闕一不可待汝而成貫之以正行明誠
為先朝輔始以直進終以直退道有消長德無緇磷
及帥湘潭尹河洛而平庶清一之政繼聞于京師名
簡吾心善入吾耳宜置朝右以之厚時風況今之尚
書漢公卿也言動可否屬人耳目焉固不專率四屬

程百工備位於冬官而已可工部尚書

太子詹事劉元鼎可大理卿兼御史大夫充
西番盟會使右司郎中劉師老可守本官充
盟會副使通事舍人太僕丞李武可守本官
兼監察御史充盟會判官三人同制

勅太子詹事劉元鼎等夫選可任而任之則用無不
適擇可勞而勞之則事無不成蓋君使臣臣事君之
大端也屬西夷乞盟求可以蒞之者歷選多士吾得
三人令以元鼎之博通師老之誠諒武之恭敏合而
為用不亦可乎爾宜臨之以莊示之以信儀刑詞氣
皆有可觀必能率服彼戎不獨益敬吾使法卿憲秩
寵之以遣可依前件

許季同可祕書監制

勅大理卿許季同國朝已來有劉德威張文瓘唐臨
為大理卿有魏徵虞世南顏師古為祕書監則設官
之重得賢之盛人到于今稱之今季同以明慎欽恤
刑獄以文學博雅掌圖籍由廷尉而長祕府論者
榮之宜自重其官自遠其道又思與張劉唐魏虞顏

白集文苑卷之六
四
為比不亦自多乎可祕書監

張元夫可禮部員外郎制

勅殿中侍御史張元夫官有秩清而選妙者其儀曹員外郎之謂乎凡殿內御史雖文才秀出功課高等者滿歲而授猶曰美遷有如元夫連膺三選歷彼踐此僉以為宜况怒飛青冥翔集禁陛由茲去者十八九焉汝知之乎思有以稱可尚書禮部員外郎

楊嗣復可庫部郎中知制誥制

勅庫部郎中楊嗣復朕聞前代制誥中書令侍

郎舍人通掌之國朝已來或以他官兼領惟其人是用不限於資秩職署焉予以為然多繇是選前所命者時稱得人研實覈名次第及汝嗣復根於義訓播為令器文煥發而才秀出不當汨沒於郎吏間况貞元中汝父為中書舍人甚稱厥職今使汝繼書吾命成一家言堂御犯名國華在於此舉爾宜兢兢祇勵無隕其名可庫部郎中知制誥

張平叔可京兆少尹知府事制

勅商州刺史張平叔為人廉直為政簡惠前後歷掾

邑宰郡守而去思來暮之謠繼聞於人聽焉及副監
銜官刺商雒郡會課報政亦甲於他官自貞元以來
用三科取士奉詳明政術可以理人之詔而得其名
有其實者幾何人哉乎叔居其一也能効若是何用
不臧故事內史缺未補問亞尹得行大京兆事試可
而即真者徃徃有之故其選任日益惟重爾宜稱所
舉慎厥職無墮大以勤小無急弱以緩強夕念朝行
遵吾約束可京兆少尹知府事

康日華贈坊州刺史制

勅漢令軍中士有不幸死者得以棺斂傳送若是而
已猶四方歸心焉矧吾褒贈以榮之惻隱以將之顯
其忠撫其後亦所以激生者節豈獨慰逝者魂乎左
神策軍赴行營正將試太常卿康日華領王師死王
事軍書報奏朕甚悼焉可贈坊州刺史

張籍可水部員外郎制

勅登仕郎守國子博士張籍文教興則儒行顯王澤
流則歌詩作若上以張教流澤為意則服儒業詩者
宜稍進之頃籍自校祕文而訓國曹今又覆名揣稱

以水曹郎處焉前年以來凡歷文雅之選三矣然人皆以爾為宜豈非篤於學敏於行而貞退之道勝也與之寵名者可以獎夫不汲汲於時者可守尚書水部員外郎散官勲如故

何士又可河南縣令制

勅漢朝郎官出宰百里故令京邑令缺多命尚書郎補焉朝議郎尚書水部員外郎何士又慎檢和易介然有常守而勿失可使從政然能佩弦以自道戴星以自勤則急緩勞逸之間必使適宜而會理矣以爾舒退故吾進之可守河南縣令散官如故

崔植一子官迴授姪某制

勅丞相植典職樞務六既逾歲而能明我目達我聰左右我躬以底于道况屬郊祀攝贊大儀寵錫之間植宜加等而念其猶子乞用推恩既叶舊章允膺新命其姪某可某官

王起賜勲制

勅中書舍人王起等朕臨御之始慶賞遂行卿士大夫連加勲秩自武騎尉以上十有二轉自起已下十

有四人咸賜以勲舉書于籍可依前件

蕭俛除吏部尚書制

勅古者君使臣以禮臣事君以忠季代已還鮮由茲道先皇帝創於是故在位十五載凡解相印者殆二十人多寵為大僚或付以兵柄矧予小子宜有加焉而輔弼之臣嘗經一日造吾膝沃吾心則恩與之始終厚申恩禮不惟觀感來者且不敢失墜先志也尚書右僕射蕭俛忠肅孝敬佐吾為理以勤事國以疾退身本末初終不失其道既免樞務倚為右揆加恩

起等復吾前言而俛繼上讓章至于三四敦論煩切陳乞彌堅是用正命為選部尚書而冠六卿統百職尚可以表吾寵重亦所以成爾謙光爾宜欽厥止慎厥終無忝我褒揚之命可吏部尚書

溫堯卿等授官賜緋充滄景江陵判官制

勅溫堯卿等今之俊乂先辟于征鎮次升于朝廷故幕府之選下臺閣一等異日入為大夫公卿者十八九焉荆門景域南北大府而堯卿等或已叅軍要或方受兵書客命以官分試其事名秩章綬分而寵之

夫千里之行始於足下苟自強不息亦何遠而不屆
哉可依前件

神策軍及諸道將士等一千九百人各賜上
柱國勳制

勅古之善為國者勞不忘而賞不濫有賞一人而為
僭者有賞千百人而不為費者其要在當否而已不
繫於衆寡也朕自統御已來忽忽有念天下材力之
將勇敢之士進有征討之苦退有守捍之勤藏之中
心何嘗暫忘而亟因大慶恩洽普恩某等若干人咸

進勳級並可上柱國

李彤授檢校工部郎中充鄭滑節度副使王
源中授檢校刑部員外郎充觀察判官各兼
侍御史賜緋紫制

勅萬年令李彤侍御史王源中等舜以伍長緩四國
若今之節制也周以十聯率諸侯若今之兼察也國
家合為一柄付有功諸侯故其陪臣選任益重或輟
朝籍按簡書者往往而有况承元有大忠于國受重
任于外使其承上蒞下敬始善終實在庶察叶力以

濟今以彤宰京邑有理劇之用如水在器撓之不濁
以源中立憲府有排正之能如刃發硎割之無滯一
可以倅戎事一可以佐輶車二職交脩在此一舉臺
郎憲吏金印銀章加乎爾身無忝我命可依前件

柳公綽父子溫贈尚書右僕射竇侂父叔向
贈工部尚書薛伯高父懌贈尚書司封郎中
元宗簡父琚贈尚書刑部侍郎皇甫鏞父愉
贈尚書右僕射韋文恪父漸贈太子少保王
正雅父翊贈太子太師范季睦父彥贈禮部

郎中八人亡父同制

贈古人有云樹欲靜而風不止子欲養而親不待倘
無顯揚褒贈之事則何以旌先臣德慰後嗣心乎故
屢每施大恩行大慶而哀榮之命未嘗闕焉銀青光
祿大夫行尚書吏部侍郎上護軍河東縣開國子柳
公綽父溫等咸有令子集于中朝資父事君移忠自
孝本於嚴訓酬以寵名賜命追榮各高其等嗚呼存
身不遺性者有知斯可以載揚蘭陔之光輟風樹之
馨耳可依前件

李宗何可渭南令李玘可京兆府戶曹制

勅李宗何等夫綱一提則羣目舉源一澄則衆流清
故朝廷命官師選察屬亦得其人矣按右史公綽奏
宗何學古脩己練達理道乃乞為旬縣令玘勁節狗
公通詳典故乞為天府掾况涓陰封圻之守邑祠曹
賦籍之要司位雖未高職亦不細宜乎以三語自試
以一同自勅無俾爾長貽失舉之責焉可依前件

兵部郎中知制誥馮宿侍御史張沆義成軍
行軍司馬御史中丞蕭籍饒州刺史齊照鄧

州刺史渾餼並可朝散大夫同制

勅某官馮宿等凡品秩之制有九自五而上謂之貴
階而宿司吾言注持吾寫籍照以降皆著勤慎由朝
議郎一進而及此此之所以為貴者蔭及子命及妻
豈惟腰白金服赤帶後大夫之後而已寵數既重思
有以稱之並可朝散大夫

太常博士王申伯可侍御史益鈇堆官監察
御史袁行高諧河東節度叅謀兼監察御史
崔植並可監察御史三人同制

勅某官王申伯學優行茂飭以詞藻執禮定議多得
其中某官高諧温莊潔白不交勢利某官崔植外和
內直通知政典在倫輩內而人皆謂之滯淹唯是二
三子之才吾與御史中丞僧孺御史吾耳目官也非
清明勁直不泥不撓者安可使辯淑慝振紀律廣吾
之聰明焉並命同升無忝是舉可依前件

温造可起居舍人充鎮州四面宣慰使制

勅殿中侍御史温造嘗糾天府不曠官馳軺車不辱
命况為人外和內決以蕪濟為心拔居殿中以備時

使會吾憂兩河間事求可諭朝肯慰人心者使焉揆
効酌能汝中吾選故不待滿歲擢為右史出則嘶吾
命入則記吾言獎任不輕思有所立可依前件

高芳穎等四人各贈刺史制

勅故某官高芳穎等昔文王塋枯骨之無知也但惻
隱之心不忍棄也故天下皆歸仁焉况捐軀之魂死
節之骨見危併命朕甚憫之深州故將高某等四人
皆從戰陣連殲王事廢贈之數宜其有加並命追榮
以光死下可依前件

崔瑊可洛陽縣令制

勅度支員外郎崔瑊漢以四科辟士求多畧不感強
明決斷者任三輔令故今四京令缺而釋尚書郎有
才理者補之而瑊在郎署中推為利用加以詞學緣
飭吏能操割洛陽必有餘刃然宰大邑如烹小鮮人
擾則疲魚擾則餒寬猛吐茹其鑒于茲可洛陽令

周愿可衡州刺史尉遲銳可漢州刺史薛鯤
可河中少尹三人同制

勅前復州刺史周愿等夫勞者之恩休息病者之恩

救療人之本情也今兵戈甫定物力未豐聞湘衡巴
漢之間人猶疲困宜擇良二千石俾休息而救療之
而愿銳鯤等前以符竹分領三郡皆有善政達于朝
廷舉課考能無愧是選息勞救病其有望於汝乎河
中吾之股肱郡也二尹職而佐府事者在得人命
鯤處之無荒厥職可依前件

楊景復可熱校膳部員外郎鄂州觀察判官
李綏可監察御史天平軍判官盧載可協律
郎天平軍巡官獨孤涯可監察御史壽州團

練副使馬植可試校書郎涇原掌書記程普
範可試正字涇原判官六人同制

勅某官楊景復等士子不患無位患已不立苟有所
立人必知之惟爾等六人蘊才業文咸士之秀者果
為賢侯交辟俾朕得聞其姓名是用各進其秩分授
以職若循飭不已籌謀有聞則鴻漸之資當從此始
而景復稟訓抵命頗著令稱故因滿歲特假臺郎古
者公臣之良人補王職朝獎非遠爾其勉之可依前
件

前廬州刺史殷祐可鄭州刺史制

勅某官殷祐夫吏寬信則人人不偷吏廉明則人人
盡力吾觀祐之為政其近之乎前守廬江能率是道
歲會課第甲於他州俾精前功早伸來効宜換符竹
移牧鄭人在春秋時鄭為侯國武公善盡其職子產
遺愛於人人無古今吏有能否聽吾用汝汝其嗣之
可鄭州刺史

李德循除膳部員外郎制

勅尚書左侍郎自奏議彌綸外凡邦之牲豆之品醴

膳之數實糾理之命文昌長佐春官卿以朝散大夫
兼祕書丞上柱國李德循籍訓于台庭業官于書府
捨才考第得補為郎司膳缺員爾宜專掌可尚書膳
部員外郎餘如故

張正甫可同州刺史制

初馮翊吾左輔也分理浩穰率先風化故其選次在
內史一等而冠四方岳牧之首焉宜求吏課位高望
重者分部共理以夾輔京師尚書左丞賜紫金魚袋
張正甫自登臺閣為人謹直物論時望敬而重之及

領藩部為政寬簡將吏黎庶信而愛之所謂朝廷正
臣郡國良吏常有惠政加于是邦迨茲五年去思猶
在故輟臺轄再委郡符宜敬服新命增脩舊政俾吏
畏如夏日人歸如流水慎于終始典于厥官可持節
同州諸軍事守同州刺史充本州防禦使散官勳如
故

崔瑄可職方郎中侍御史知雜制

勅近歲已來副相多缺朝綱國紀專委中憲而侍御
史一人得總臺事以左右之令御史中丞德裕以中

散大夫行尚書吏部郎中上柱國崔瑄守文無害
蒞事惟精在郎署中理奏補是職請觀其能
因而可之仍加寵秩擢執舉措爾無自輕可行尚書
職方郎中兼侍御史知雜教官勳如故

錢徽可司封郎中知制誥制

中臺草奏內庭掌文西掖書命皆難其人也非慎行
敏識茂學懿文四者兼之則不在此選祠部郎中翰
林庶子錢徽藹然儒風粲然詞藻績密若玉端直如
弦自參禁司益措其美貞方敬慎久而彌彰應對必
宜敬承可依前件

獨孤郁司勳郎中知制誥制

見於據經奏議多聞於削藁迨今六載其道如初嘉
其忠勤宜有遷擢俾轉郎吏仍參綸閣茲乃榮獎爾
宜敬承可依前件

自外郎擢居右闈綸言樞命既重且難委以發揮甚
聞稱職而端諒忠謹介然自居為臣若斯足可嘉獎
官當滿歲職亦逾年宜從美遷以光近侍可司勳郎
中知制誥

白樂天文集卷之九

制

傳良弼可鄭州刺史制

初金紫光祿大夫使持節沂州諸軍事行沂州刺史
兼御史中丞騎都尉傳良弼燕異之間紛擾之際多
壘失守孤城保全介于險中率乃麾下轉戰郊野來
覲闕庭徇義誠親忘家喪子忠勤勇烈人所難能若
不棄升何勅未者海沂剖竹未足報功溱洧頒條可
兼觀政敬承後命無替前勞可使持節鄭州諸軍事

行鄭州刺史兼御史大夫散官勳如故

河北權鹽使檢校刑部郎中裴弘泰可權知

貝州刺史依前權鹽使制

勅某官裴弘泰以幹蠱之才領鹽鹵之務管權條制
勳皆得宜觀其所能若有餘地可假兼職俾之牧人
而河北列城久乏良吏俗多思理政不難施亦猶凍
餒之人易為衣食今予命爾煦而飫之襦袴之謠佇
入吾耳可兼知貝州刺史

崔陵可河南尹制

勅河洛千里都畿在焉俾之又安屬在尹正鳳翔隴
州節度觀察處置等使正議大夫檢校禮部尚書兼
鳳翔尹御史大夫上柱國開國男食邑三百戶賜紫
金魚袋崔陵有精敏之用潔直之操施于有政由是
知名始資州縣之勞卒致公卿之位況刺郡有理行
主計無僣違尹右輔而鎮西郊蓋獎能報勤之旨也
昔吳公為河南守謹身廉平人服教化袁安為河南
尹政令清肅號為嚴明誰其嗣之無易爾陵往為表
則勿替能名可檢校禮部尚書兼河南尹散官封賜

如故

侯丕可霍丘縣尉制

勅賜太常寺奉禮郎翰林待詔上護軍侯丕夫執藝以事上奉詔而處下其於出入謹身夙夜祇命比他局署實倍恭勤既寵之以職名又優之以祿俸蓋先勞後食之義也汝其承之可守壽州霍丘縣尉依前翰林待詔勲如故

崔楚臣可兼殿中侍御史制

勅成德軍節度押衙銀青光祿大夫檢校太子賓客

兼監察御史崔楚臣材膺爪士職在牙旗每祇命以奉辭必竭誠而得禮既嘉詳敏念恭勤式示寵名宜遷憲秩可殿中侍御史餘如故

王庭湊曾祖可贈越州都督祖朱恒活可贈

左散騎常侍父昇朝可贈禮部尚書制

勅成德節度鎮興深趙等州觀察處置等使紫金光祿大夫檢校工部尚書兼鎮州大督府長史大夫上柱國太原縣開國男食邑三百戶王庭湊曾祖故忠武將守左武衛大將軍員外置同正員兼試太常卿

王哥之等鬼神有知履孝敬者福祿至王侯無種仗
忠信者富貴來我有列臣本於良徹奮發而勵節許
國感激而揚名顯親夫教必有初德無不報安有收
其材而遺其本愛其後而忘其先乎是用褒崇以弘
寵澤庶使聞者起孝作忠可依前件

崔群可祕書監分司東都制

勅前武寧軍節度徐泗濠等觀察處置等使正議大
夫檢校兵部尚書使持節徐州諸軍事兼徐州刺史
御史大夫上柱國賜紫金魚袋崔群夫受至寶為國

重器始自脩己移於事君輔弼藩宣不失其道及離
征鎮召赴闕庭方登道途遂罹疾恙正在願養之際
豈任朝謁之勞誠宜許以便安不可闕其祿食而移
秩外史分曹東周加寵優賢無易於此且有後命俟
其有瘳可守祕書監分司東都散官勲賜如故

董昌齡可許州長史制

勅將仕郎權知泗州長史兼殿中侍御史賜緋魚袋
董昌齡頃為宰邑今贊郡符皆聞約已之名每展在
公之節稽其器局允謂廉能議以稍遷用彰勤効可

許州長史兼侍御史散官如故

柳經李褒並泗州制

勅斷事郎前河南府河南縣柳經儒林郎試太子
通事舍人李褒等瀕淮列城泗州為要控轉輸之路
屯式過之師故府有寮軍有倅選擇補署得聞於朝
廷而經等皆有所長宜當是選守臣置奏因而可之
仍加秩命用示優寵經可監察御史充泗府團練副
使散官如故褒可試太常寺協律郎充武寧軍節度
泗州兵馬留後判官仍改名言散官如故

張諷等四人可兼御史中丞侍御史監察御

史同制

勅義成軍節度馬步都知兵馬使光祿大夫檢校太
子詹事兼侍御史上柱國張諷等御史府自中執憲
暨察視之官皆顯秩也唯懷才而屨効者可以授焉
爾等昨領偏師出疆赴難指蹤而去摩壘而還忠勇
勤勞宜有加獎故以憲職第而寵之可依前件

啖異可滁州長史許志雍可永州司戶崔行
儉可隨州司戶並准赦量移制

勅守袁州司馬員外置同正員啖異等有司奉新制
明舊章九員疵瑕必霑慶澤况爾等各有才用多淹
歲時譴累重輕違從恩貸班資遠邇率以例遷如聞
遷條豈忘率復可依前件

程執撫亡父懷信贈太保李佑亡父景略贈
太子少傅柏耆亡父良器贈太子少保白餘
察亡父孝德贈太保同制

勅中散大夫檢校右散騎常侍兼右神武軍大將軍
知軍事御史大夫上柱國河東縣開國男食邑三百
戶賜紫金魚袋程執撫父贈太子太保懷信等咸有
忠勲播為元德悉承義訓無在後昆故吾令臣乃皆
愛子嚴弓裘而稟詩禮猶水木之有本源將使天下
之為人子者感恩天下之為人父者知勸宜加寵贈
以表顯揚可依前件

嚴謨可桂管觀察使制

勅漢置部刺史掌奉詔條糾吏理蓋今觀察使職耳
桂林秦郡也東控海嶺右拖蠻荒自隋迄今不改戎
府地遠則權重俗殊則理難馴而化之非才不可朝

議大夫前守祕書監驍騎尉賜紫金魚袋嚴謨嘗守
商洛刺黔巫州部縣道是能用寬猛相濟
之政撫夷夏雜居之人然其往効式是南邦况
爾操行端和文學精茂密書府善於其官勉副前
言佇申後命可使持節都督桂州諸軍事守桂州刺
史兼御史中丞桂州本管都防禦觀察處置等使散
官勲如故

杜式方可贈禮部尚書制

初三不寵祿歿有褒崇此王者所以明終始之恩厚

君臣之道也故桂州本管都防禦觀察等使正議大
夫使持節都督桂州諸軍事守桂州刺史兼御史中
丞上柱國南陽縣開國男賜紫金魚袋杜式方慶龍
台庭任當垣翰服名教乃保家之子樹風聲為守土
之臣盡禮事君勞心奉職奄忽淪逝念之惻然况近
屬連姻遠藩捐館聞訃之命實悼中心贈飭之恩宜
加常等俾延榮於八座賁寵於九原可贈禮部尚書
仍賜布帛二百段米粟二百石委度支逡便支遣

武昭除石州刺史制

勅某官武昭王師伐蔡爾在行間致命奮身挑戟當
寇忠慎所感卒獲生全求之軍中不可多得司馬以
爾信直謹厚可領邊城爾宜酌乃已知副我朝獎撫
獯戎雜居之俗安離石重困之人勉而蒞之其任不
細可石州刺史

梁希逸除蔚州刺史制

勅某官梁希逸頃為蔡將陷在賊庭知有君臣不顧
妻子率其所屬當戰陣前反旆倒戈翻然歸我忘家
之士希逸有之間從司空在平淮右指蹤御命皆稱

所使可以移用俾之守疆北邊列城蔚為衝要雄右
軍號務兼錢刀酌勤撰能俾乃熱領正思來効以續
前勞可蔚州刺史兼橫野軍使并知本州鑄錢事

盧元勳除隍州刺史制

勅盧元勳乃者鎮帥身喪師承元納款之際拓者將
命之時人情涵然未知嚮化而元勳挺身奮臂出於
至誠鎮定安危分別逆順顏色不撓聲氣甚厲言行
事立朕甚多之雖有優升未酌義烈宜以一郡寵而
旌之用勸四方聞其風者可隍州刺史

揚孝直除滑州長史制

勅揚孝直早以才力從戎與方專習武經通知吏事
元勳移鎮孝直實來詢謀馳驅有所補助軍部之佐
寵秩非輕用答忠勞以明勸獎可滑州長史

張嘉泰延州長史制

勅前丹州司馬張嘉泰一從戎旅多歷歲時奉職有
勞卒身無過軍部長佐資秩不卑自丹轉延頗為優
穩題與便道往守乃官可延州長史

魏玄通除深王府司馬制

勅魏玄通有禦侮之才扞城之略服勤戎職善寄邊
州訓旅牧人有可稱者夫文武迭用出入序遷所以
開才能而均勞逸也爾宜解綬郡邸曳裾王門飭躬
慎義以奉朝謁可依前件

楊造等亡母追贈太君制

勅通事舍人楊造翰林待詔某亡母等生播徽華歿
留儀範訓保家之子為有國之臣或相禮彤庭或待
詔金馬咸居禁近率有忠勤風樹之心必憂深而思
遠慕蕭之澤宜自樂而流根並啓邑封各從子貴揚

名之孝與汝成之可依前件

張植李翱等二十人亡母追贈郡夫人制

勅壽州刺史張植亡母某氏等夫忠於上者教有所自仁於下者恩有所延孝理之風實由此作當今良二千石皆與朕共理雖祿不逮養而名可顯親將慰匪我之心宜流自葉之澤俾從子貴咸贈邑封

陳中師除太常少卿制

勅尚書吏部郎中兼侍御史陳中師早以體物之文待問之學中鄉里選第甲乙科及筮仕立身皆有本

末不背俗以矯逸不趨時以沽名從容中道自致聞望累踐郎署再參憲司官無卑崇事無簡劇如玉在佩動必有聲為時所稱何用不可朕以立國之本禮樂為先今之太常兼掌其事貳茲職者不為重乎歷代迄今謂之清選徃復是命佇觀有成予方急才爾寧以次可太常少卿

衢州刺史鄭羣可庫部郎中齊州刺史張士階可祠部郎中同制

勅某官鄭羣等人之正即班望願重中外要職多由

是遷故其所選不得不慎必循名實而後命之羣與士階以典名郡謹身化下有循吏之風會課陟明宜當是選國之大事在祀與戎一掌祠曹一司武庫各領其要爾其敬之羣可庫部郎中士階可祠部郎中

元稹可太子左諭德依前入蕃使制

勅通事舍人元稹東宮之有諭德猶上臺之有騎省也清班優秩所選非輕朕前遣使臣往脩戎好以為言信行敬命為介焉旌出疆反駕奔命有所啓奏多所便宜乃知得人可以卒事故知是命以寵勸之可

太子左諭德依前入蕃使

盧昂量移虢州司戶長孫鉉量移遂州司戶

同知制

勅萬州司戶叅軍盧昂等頃負疵瑕各從謫譴或遠竄荒裔或未復班資既逢蕩滌之恩俾及轉遷之命况聞脩省以克已固將校試而用能吾無棄人汝宜自効可依前件

李石楊毅張殷衡等並授官克汪原判官同制

勅李石等用武之地曰涇與原合為一鎮控扼夷虜
朕授鉞責其成功布乃祇惕受命思有以自輔者因
上言石穀殷衡等學業才畫堪置幄中分務列官咸
可其請而布憂邊甚切選士必精爾宜各竭所能為
知已用可依前件

李演除左衛上將軍制

勅王者法勾陳設環列非勲勤之將信近之臣則何
以久張爪牙轉置肘腋者也某官李演嘗從德宗皇
帝南蒐于梁籍名巧臣謂之定難洎出分戎律入供

宸居內外周旋不懈于位交戰之下周廬肅然今之
轉遷示益親信移領左廣仍叅夏卿夫八蠻之警巡
七萃之勤墮爾為其正盡得察之宜惜前勞無隳乃
力可依前件

康昇讓可試太子司議郎知欽州事兼充本
州鎮遏使陳倏可試太子舍人知戀州兼充
本州鎮遏使李顥可試太子通事舍人知賓
州事兼賓澄戀橫貴等五州都遊奕使馮緒
可試太子通事舍人知田州事充右江都知

兵馬使殷晉可試右軍率府長史知濼州事
兼充左江都知兵馬使五人同制

勅容州本貫經略招討左押衙兼右廂兵馬使康昇
讓等有奉職徇公之勤有與戎殄寇之勳其帥公素
上章以聞吾方念勞爾宜受賞况容之諸郡有大小
郡之兼職有重輕量能第功分命而往噫方藩雖遠
朝聽甚卑有善必聞無功不錄吾言及此欲爾知之
可依前件

西川大將賀若岑等一十二人投御史中丞

殿中監察及諸州司馬同制

勅丞相鎮蜀志在憂邊俾靜蕃蠻實資將校故加寵
任以責成功某官某等若干人類列勲勞進登班秩
憲官名重郡佐祿優叅以命之足為勞獎爾宜辟承
主帥慎守封疆戮力一心無落戎事可依前件

前右羽林將軍李彥佐服闋重除本官兼御
史中丞知軍事制

勅軍有羽林用法星象統之取士以拱宸居某官某
前以忠勞選登戎衛而能訓勇力之士以備時使申

誰何之令以奉徼巡夙夜祗嚴不懈于位既終喪紀
宜復官常假中執憲之名行上將軍之事勉脩舊職
用副新恩可依前件

奉天縣令崔鄴可倉部員外郎判度支案制
勅奉天縣令崔鄴大凡南宮即無非慎選者也况官
之屬有堆案盈机之文有月計歲會之課故員郎不
可逾時缺不待滿歲遷事劇才難斷可知矣而鄴自
操白簡率赤縣繩舉違謬惠養鰥嫠皆有善聲著于
官次豈能於彼而不能於此乎爾宜率領人佐計務

決繁析滯期有可觀可依前件

翰林待詔李景亮授左司禦率府長史依前
待詔制

勅某官李景亮夫執藝事上者必揆日時計勞績而
後進爵秩以旌服勤况待詔官闈飭躬晝夜比於他
職亦有加恩官坊衛官以示優獎可依前件

故鹽州防秋兵馬使康太宗贈鄧州刺史制

勅故某官康太宗嘗習韜鈴夙稱拳勇使之訓旅能
叶武經使之守疆能著戎績永言殂謝宜及褒崇俾

追寵於朱轡庶知恩於黃壤可贈鄧州刺史

劉總外祖汝州刺史盧龍軍兵馬使張懿

贈工部尚書制

勅故某官張懿德善有將啓後人忠孝者克揚前烈
有美必復宜其然乎而懿仗忠履義體仁養勇學究
韜略藝窮騎射負幽燕之勁氣雖振其名有將相之
長才不得其位命屈當代慶流後昆有外孝孫為吾
賢帥以忠許國以順克家揚名顯親自義率祖推恩
外族歸美前脩俾追八座之榮以輟九原之歎可依

前件

劉總外祖母李氏贈趙國夫人制

勅李氏族茂本枝行光內則柔明繕性和淑保身輔
佐良人克諧家道訓成賢女作相令門善積於中福
延於後段公威德當流慶於外孫令伯孝心願推恩
於祖母式遵贈典用贊德音宜從大國之封追正小
君之命可贈趙國夫人

蕭俛一子廸授三從弟伸制

勅吏部尚書蕭俛頃在台庭時逢郊禮大行慶澤先

及輔臣當延賞於胤嗣願推恩於友愛厥有典例因而從之咨爾弟仲可恭茂命可河中府參軍

賈隣入迴鶻副使抄兼御史中丞賜紫金魚

袋制

勅少府少監賈隣行人之官官必有介所以敬王事而重國命也以爾隣稟訓台鼎飭躬縉紳自發班行多歷年所恪勤官次保守令名斯可以卒貳使臣諭申朝旨宜假憲秩仍加命服以示兼寵俾之出疆况繼好二邦奉辭萬里副車之任選亦不輕茲吾使能

期爾復命可依前件

張圻授廬州刺史兼御史中丞制

勅盧龍軍節度判官檢校刑部郎中張圻司徒總言爾從事於幽薊之間有年歲矣嘗委事任備觀器用務叢而益辨職久而彌勤頗出輩流宜加獎擢况公侯之嗣幕府之英餘慶所鍾有才如是今以名郡寵而任之旌善勸能仍兼中憲可廬州刺史